

**Pinerluffigineqarsimasunut ikiuisarnitta ilaatigut eqqugaasunik siunnersuisarnermik pilersitsinikkut qanoq pitsanngorsarneqarsinnaaneramik apeqquteqaat aallaavigalugu oqallinnissamik siunnersuut.**

(Inuit Ataqtigiit Inatsisartuni ilaasortaataat)

**Akissuteqaat**

(Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoq)

Naalakkersuisut inatsisinut suliassaqarfiup sammeneqarnerulernissaanik kissaateqarput, tamannalu pissutigalugu Naalakkersuisut sinnerlugit taamatut apeqquteqaat aallaavigalugu oqallittoqarnissaanik siunnersuummut qujaniarpunga.

Inatsisinut suliassaqarfimmi pinerluttoq aallaaviginerullugu sulisoqarneruvoq, suliniutillu pinerluttut pinerlukkunnaarsillugit inuulernissaannut qulakkeerinnittussat qularnaarniarneqarput.

Taamaakkaluortoq pingaaruteqartorujussuvoq pinerluffigineqarsimasut puigussannginnatsigik - pinerluttuliortup eqqartuunneqarnissaa sioqqullugu kingornagullu. Pinerluffigineqarsimasut tapersersorneqarnerunissaat pisariaqarpoq.

Naalakkersuisut ukiaq manna inatsisilerinerup iluani periusissatut suliniutissatullu pilersaarummik saqqummiinarlutik pilersaaruteqarput. Periusissaq pinerluffigineqarsimasut annerusumik tapersersuiffigisarnissaannut innersuussutinik arlalinnik imaqarpoq. Innersuussutit pinerluffigineqarsimasut pisariaqartitaat pillugit ilisimasanik katersanik kiisalu pinerluffigineqarsimasut qanoq ilillugit tapersersuiffiginissaannut suliniutissanik assigiinngitsunik imaqarput.

Ataatsimut isigissagaanni pinerluttuliornikkut pinerluffigineqarsimasut, oqartussaasunillu attaveqareerlutik qanoq misigisartik namminneq misigisarneraat iluamik ilisimasaqarfiginngilavut. Taamaammat tamanna misissuiffigissallugu paasiniaaffigissallugulu pisariaqarpoq, taamaaliornikkut pinerluffigineqarsimasut maluginiarneqarnerulissammata pisariaqartitaannillu neqeroorfigineqarniassammata. Misissuinermilu aamma misissuiffigisariaqarpoq suliamik ingerlatsisoqartillugu piffissap ilaani pinerluffigineqarsimasut allanut sanilliullugit immikkut tapersersorneqarnissamik pisariaqartitsisarnersut.

Nakuusernarnermut Periusissaq Iliuusissatullu Pilersaarut 2014 - 2017-imut ilaasumik oqarasuaat atorlugu pinerluffigineqarsimasunut siunnersuisarfimmik pilersitsinissamik Naalakkersuisut piareersaapput. Pinerluffigineqarsimasunut siunnersuisarfimmik pilersitsinissami pinerluffigineqarsimasut siunnersuisarfimmut saaffiginnissinnaanissaat siunertaavoq, siunnersuisarfillu tarnip pissusaanik ilisimasalimmik tapersersuilluni oqaloqateqarsinnaanermit, inatsisitigut ikiorneqarsinnaanermit, ajoqusernerup sillimmasiarfimmut nalunaarutigisarnerneranut allanullu neqeroorsinnaaneq.

Naalakkersuisuttaaq isumaqarput pingaartumik inummut sakkortuumik pinerlunnermik pinerluffigineqarsimasut pisariaqartitaminnik paasissutissiiffigineqarneq ajortut. Matumanilu pineqarput pinerluffigineqarsimasut inatsisitigut inissisimanerat pillugu inatsisitigut

paasissutissiisinaaneq kiisalu suliamik politiit eqqartuussiviillu suliarinninnerat pillugu paasissutissinneqartarneq. Pineqartut tamakku pinerluffigineqarsimasut ilisimasaqarfiginngikkajuppaat, pinerluffigineqarsimasummi pinerluffigitinnermikkut misigisatik pissutigalugit qanoq iliornissartik nalusarmassuk.

Saammaasseqatigiinnissamut Siunnersuisoqatigiinnik pilersitsinissamik suliaq pillugu Justitsministeeriaqarfimmik suleqateqartoqarpoq. Aammattaaq nakuuserarneq pillugu siunnersuutissanik suliaqartoqarpoq, taannalu suliniutissanik pinerluffigitissimasup iluaqutigisinnaasaanik imaqarpoq.

Pinerluffigitinneq, pingaartumik sakkortuumik pinerluffigitinneq, ajortunik kingunerluttarpoq. Tassalu pisariaqarluinnarpoq pinerluffigineqarsimasut taakku ingerlariaqqinnissaannut ikiunnissatsinni neqeroorutit pisariaqartinneqartut pigissallugit. Taamaamat inatsisinik unioqqutitsinikkut eqqugaasunut suliniutinik ikiutaasinnaasunik Naalackersuisut aallartitsiniarput, taakkunungalu ilaavoq pinerluffigineqarsimasunut siunnersuisarfimmik pilersitsinissaq.

Taamatut Naalackersuisut oqaaseqarlutik oqallittoqarluarnissaa kissaatigaat.